



Communicaziun a las medias

Berna 21.06.2021

Il cusseglier federal Ignazio Cassis ha visità las scolaras ed ils scolars da Glion

Viadi en Surselva: glindesdi, ils 21 da zercladur 2021, è il cusseglier federal Ignazio Cassis sa scuntrà cun ina classa da la scola secundara da Glion. Las scolaras ed ils scolars han envidà il cusseglier federal Cassis a chaschun da l'emprima emna deditgada a la lingua rumantscha («Emna rumantscha») lantschada dal DFAE il favrer 2021.

La visita dal cusseglier federal Ignazio Cassis a Glion fa part da la «Emna rumantscha». A chaschun da la lantschada da l'Emna da la lingua rumantscha, che ha gi lieu online ils 19 da favrer 2021, ha il cusseglier federal Cassis ditg ch'el veglia approfondar sias enconuschientschas dals tschintg idioms rumantschs. La classa da Glion che sa cumpona da 12 scolaras e scolars en la vegliadetgna da 15 fin 16 onns, ha profità da la chaschun ed envidà il schef dal DFAE per dar ad el in'emprima impressiun da la diversidad linguistica e culturala da la regiun.

In ferm toc Svizra

«Jau engrazièl a las scolaras ed als scolars da Glion sco er a lur personas d'instrucziun per quest invit. Ensemen cun els sun jau returnà en scola per cuntinuar mes viadi da scuverta da la cultura rumantscha e da las identitads multifaras da noss pajais», ha affirmà il cusseglier federal Ignazio Cassis. «Er il rumantsch, gist sco las autras linguas naziunalas, è in ferm toc Svizra.» Il schef dal DFAE ha preschentà als giuvenils intginas ideas per la proxima «Emna rumantscha» che ha lieu il favrer 2022.

Dialog intercultural e diplomazia

La promoziun dal dialog intercultural è in punct central da la diplomazia svizra. Perquai ha il cusseglier federal Ignazio Cassis lantschà la «Emna rumantscha». A questa emprima ediziun ch'è vegnida organisada ensemen cun il chantun Grischun èn sa participadas numerusas represchentanzas svizras a l'exteriur. «La Svizra sto tgirar er vinavant sia plurilinguitad, perquai ch'ella è in avantatg en las relaziuns cun auters pajais. Returnar en scola ed emprender dals giuvenils è ina pussaivladad per far quai.»

La promoziun da las linguas minoritaras en Svizra tutga er tar las prioritads dal dialog politic structurà ch'il schef dal DFAE maina cun ils chantuns Grischun e Tessin sco er cun las commembras italofonas ed ils commembers italofofonas da las Chombras federalas.